

# Odette du Puigauveau : ur vaouez dreistordinal

**E Sant-Nazer hag en Oriant eo bet roet an anv "Anita Conti" d'ur skolaj. Ur vaouez a-feson e oa Anita Conti. Evel moroniourez ha luc'h-skeudennerez eo bet un avantur bras he buhez. Hogen, ur vaouez dibar all, ganet e Sant-Nazer, a veve en amzer-se : Odette du Puigauveau.**

**a**navezet eo Odette du Puigauveau evel tudoniourez pobloù ar Sahara. Adalek 1933 e veze ergerzhet an dezerzh ganti hag anavezet an dud a veve eno. Er bloavezhioù 1960 e nagennas Odette an esaeoù nukleel er Sahara hag emzalc'h prezidant Maouritania, Moktar Ould Daddah, e-keñver ar Stad c'hall, trevadennerez kozh ar vro. Re sentus e oa ar prezidant maouritanian hervez Odette.

## UR PENNADIG E PARIZ A-RAOK DISTREIÑ D'HE BRO

Digomprenapl eo neuze gwelout an istorourien pe ar bolitikourien vreizhat mut war ar pezh he deus graet e Breizh, evel pa 'vije didalvoud. E-barzh an Emsav breizhek n'eo ket ken brudet-se zoken. Koulskoude e oa bet ganet Odette du Puigauveau e 1894 e Sant-Nazer. E Maner Kervaudu er Groazig en em stalias he familh e 1906. Desavet ha desket e oa bet er gêr gant he zud ha marteze eo abalamour da se eo bet ken disheñvel diouzh ar merc'hed all er gevredigezh hengounel-se. Abred a-walc'h ez eas kuit da Bariz evit bezañ dizalc'h. Ne oa ket ur "Bécassine" anezhi tamm ebet ! Tresourez evit arnodvaou skiantel eo bet, ha warlerc'h stilourez e ti Lanvin, ha kazetenerez. Ne gave ket he flas koulskoude... hag amañ e teu he buhez da vezañ dedennus en Istor hor bro !



Golo *Grandeur des îles* (1964) ha skritell un diskouezadeg diwar-benn Odette du Puigauveau e Koeron.

## TOMM D'AR VUHEZ WAR VOR IVEZ

Nac'het e oa bet dezhi mont da Antarktika gant ar c'homandant Jean-Baptiste Charcot met e Breizh, er gêr, e kavas an doare d'ober troioù war vor. Ma ne veze ket asantet dezhi mont er bagoù paotred enno e kemere perzh Odette e 1928 e mareajoù gant maouezed Sene er Mor-Bihan. E-pad tri miz e veze chevretaet ganto. Gant ar skiant-prenet-se e voe roet ul levrig mor dezhi hag a roe gwir da lestrañ. Ul lesanv he doa rastellet gant he c'hompagnunez Marion Sénones, livourez anezhi : Perrine ! Er mare-hont e veze ralkenañ gwelout merc'hed war vagoù pesketa. E 1929 voe degemeret e bagoù-toneta eus Enez Groe e Konk-Kerne. Ur vicher paotred e oa pesketaer, pe pigouilher kentoc'h. He eontr Alphonse de Chateaubriant a alias dezhi skrivañ pennadoù kelaouiñ. Ha setu-hi aet da gazetennerez !

## STUDIAÑ BUHEZ AN ENEZOURIEN

Odette a reas anaoudegezh gant ar vuhez en inizi : Groe, Eusa, Molenez, Sun. Peadra



da skrivañ ul levr dedennus : *Meurded an inizi (Grandeur des îles)* embannet e 1946. Poltreoù don a vez kavet e-barzh. Evit Odette ez eo merc'hed an inizi "rouanezed o ziegezh met mitizhien o enezenn". Eno e veze studiet ganti buhez an dud. Ne oa ket pell diouzh ar Groazig met eviti e oa ken pouezus Breizhiz ha pobloù all er bed. Plas ar brezhoneg zo pouezus ivez el levr. He distro er c'hêrioù bras a oa bet diaes dezhi. Entanet e oa gant ar broioù paour-se m'he doa kavet kengred memes tra. Un testeni pouezus evit kompren istor an enezourien e Breizh.

## UR VREIZHADEZ DA VRUDAÑ E BREIZH

E-barzh niverenn *Pobl Vreizh* miz Here 2016 e lavare Michel François diwar-benn Odette du Puigauveau e oa "ur Vreizhadez a benn, amoureux eus ar vuhez hag eus gwirionez an dud ha n'heller ket dic'houzout anezhi e mod ebet". Leun eo Istor Breizh a baotred veur. Ar plas lezet d'ar merc'hed ennañ zo re vihan ha mat e vefe enoriñ reoù hag o deus graet berzh. Odette du Puigauveau en o zouez...